



Athinbyâye jènèrale dou 26.03.2023

Ou Kâfé dè la Gâre a Vuadin

Apri on'evê ke rèchinbyè pâ mé a on vretâbyo'evê, l'è le dzouyo dè chè rètrovâ in'athinbyâye, è achemin por akutâ la pithe dè tèâtre dè nouthra tropa. L'è 'na komèdiya ke l'è dza jà dzuyète li a bin di j'an, tranchlatâye pê Miyète Franyîre, adaptâye pê di minbro de la tropa, è betâye in sène pê ChristineOverney Ruffieux, «*Trè por on mulè*» .

Konto rindu

1. Moncheu le prèjidin Marcel Thürler àrè l'athinbyâye è kouâ la binvinyète i 115 minbro prèjin, in partikuyi a M. Dzojè Konba, prèjidin d'anà, M. Gérard Genoud, dèlègâ dou komité kantenal. Lè kotyè minbro ke l'an prè la pèna dè l'ou j'èchkujâ chon chu la lichts d'apâ.

2. Chruktateu : chon nomâ è rèmarhyâ d'avâ akchaptâ ha tâtse po vouè : Edouard Remy, François Brodard, Roland Meyer, Bernard Oberson, Denis Romanens, Yves (Vonvon) Kolly.

3. Protokole : le konto rindu dè l'athinbyâye dou 03.04.22 l'è yê pê vouthron chèrvetâ, aprovâ chin rêmârkè, avoui rêmârhyèmin

4. Konto : nouthron bochè Albert Kolly l'è èchkujâ a kouja dè pochyin dè chindâ. L'è le grâta-papê ke prèjintè la chituachyon è bayè lè j'èchplikachyon avoui di tsifro ke léchon on cholido bilan a l'èvri po l'avinyi.

5. Vèrifikateu : lè konto chon j'ou koupyenâ è vèrifyâ pê Tobi Gremaud è Jean-Louis Romanens. L'an pu konchtatâ ke to irè in ouâdre din la kontabilitâ.

6. Aprobachyon : chu lu propojichyon, lè konto chon aprovâ chin rêmârkè a l'unanimitâ, avoui rêmârhyèmin aplôdi ou bochè po to le bon travô.

7. Aktivitâ 2023 : paté din lè j'èkoulè «initiation» din lè klachè 8H, grâthe a l'éde dè Carmen è Dzâtyè ke l'avan betâ a dichpojichyon di farmo bounè badyè. On gan marthi a là. Po chin on rètsêrsè di profècheu din le tyinton.

Rinkontrè dè patê a Tsèrlin le premi demikro dou mê, animâyè pê Alodie, Bernâ è Hubè. Mècha in patê le 13.8. i «j'Invouètè», organijâye pê la Kemouna dè Tsarmê è la famiye Biland, chèlèbrâye pê nouthron èrmounê Dominique Fragnière. Goutâ di patêjan le 1.10. a la Méjon dou Grevire a Pringy. Mècha dou chovinyi le 5.11. a Vaulruz, achebin chèlèbrâye pê Dominique Fragnière.

8. Rapouâ dou prèjidin : rêmârhyèmin ou komité po la bouna kolaborachyon.

Bravo i j'akeu dè la tropa è Christine po la betâye in sène dè ha galéja pithe. Chè dzuyèrè onko lè 1 è 2 d'âvri. Marthi ou chotin dè la Banka Raiffeisen.

Marthi a Lucien, Maxime è lè j'éde po lè bi dèkouâ.

Marthi a Romin, Titi è kotyè j'ôtrè j'ôteu ke no no rèdzoyon dè yêre ti lè dechando din le «*deché-delé*» de La Grevire .

Radio-Friboua, totè lè demindzè matin Denis Romanens è André Piccand (èchkujâ vouè) prèjinton di j'invitâ, ke chon akutâ bin yin dè vèr no. On gran marthi.

Marthi a Bali (Jean-Marie Liard) ke l'a vouèrdâ la tâtse dè bandèrè, è ke dè tru chovin inhyenâ nouthron drapô po lè minbro ke chon modâ po le Gran Patchi.

On gran marthi a ti lè profècheu ke bayon di kour din lè CO. Oun'èpràva cherè fête du tin dè l'outon ke vin din la Brouye.

On to gran marthi i j'animateu di rinkontrè ke chè bayon prà dè pèna po tsèvanthi nouthron bi patê.

Bravo i mantinyârè ke l'an rèchu la dichtinkchyon a la Fitha internachionale a Porrentruy, pèrmi là 19 fribordzè (6 po la Grevire). Le konkour «littéraire» l'a jà bin dou suksè.

Fèlichitachyon a Jean-Marie Oberson (Pèli) ke l'è jà rèkonpinchâ pèr on premi pri.

9. Dèmichyon – admichyon – mouâ : dèmichyon ?; admichyon 22 ; mouâ 24 ;

A chi dzoua 556 minbro.

Ouna vouërba dè tyèja lè dèmandâye in mèmouâre dè nouthrè minbro ke chon ora ou Gran Patchi.

10. Divê : Djan Tsarère prèjintè chon lêvro «*Fabuleux*» avoui 40 fâbyè de *Jean de La Fontaine* tranchlatâye in patê, a yêre è akutâ in patê è franché.

Nouthron prèjidin d'anà Dzojè Konba rêmârhyè le komité è prèjintè chè veu a Albert po 'na mèyà chindâ pochubyo. I rêmârhyè achebin totè lè pèrchenè ke chè bayon de la pèna po la tsèvanthe dou patê è kouâ a ti la bouna chindâ.

Gérard Genoud chaluè to le mondo è fèlichitè lè j'akteu po la bala pithe.

Lucien rêmârhyè Marcel po to chon travô. I fèlichitè Marcel, Irénée et Albert ke l'an fithâ lou 80 an, è kouâ lè bon veu a Albert.

Po hyoure in byoutâ, no tsantin Poyi.

Il'è 16.40h.

Le grâta-papê : Irénée Braillard